



Nestes días ADEGA e o Proxecto Ríos estamos en participar en diversos foros sobre a problemática das especies exóticas invasoras (EEI). Este **venres 13 de maio** estaremos na [**Reunión Ibérica sobre Plantas Invasoras**](#) que se celebra na Universidade de Vigo con varios relatorios, e nun [**Obradoiro de recoñecemento de EEI**](#) no CIUDEN ("Ciudad de la Energía") de Ponferrada, onde achegaremos aos participantes do Proxecto Ríos do Bierzo-Laciana a metodoloxía para a identificación da flora exótica invasora posta en práctica por ADEGA no río Sil.

A introducción das EEI é despois da destrución dos hábitats, a ameaza máis importante para a conservación da biodiversidade segundo a UICN, especialmente para as especies autóctonas e en perigo de extinción.

Preséntase como un problema silencioso, pouco espectacular comparado cun



verquido nun río ou no mar, pero igual ou máis pernicioso a longo prazo. As invasións ademais de afectar a biodiversidade, poden incidir nas actividades económicas e mesmo algunhas especies na saúde humana. A erradicación de exóticas invasoras adoita ser moi complicada e ás veces non hai garantía de éxito. A mellor acción é, xa que logo, a prevención: tentando evitar novas invasións, estudando os efectos sobre o medio das xa existentes, detectando puntos sensíbeis edivulgando a problemática entre a sociedade con campañas de educación ambiental dirixidas a concienciar á cidadanía así como a sectores específicos, etc.

Por todo isto, dende ADEGA e o Proxecto Ríos levamos varios anos prestándolle especial importancia á problemática das especies exóticas invasoras, realizando actividades de divulgación, educación e voluntariado ambiental ([Campos do Tea](#) , [Proxecto Corna](#) , [Móllat e polos Humidais](#) , entre outras) que nos permiten achegar e concienciar á cidadanía sobre esta problemática.